

Carel of Cees



Wae hebbe we dao dan.....

In Tegelen op un prachtige plek, vanoèt de tuin ut oetzich op unne echte berg

wao rôndum un meertje waat herte en ander viëe löp, woënt Carel sinds 2006.

Regien en ik zien 37 jaor geleeje getrouwd maar woëne pas vanaaf 2006 op dees plek in Tegele.

Ozze zoon Frank woënt nog lekker thoès.

Veur um netuurlik gemekkelik en goodkaup dus waorum zoelse op dich zelf gaon woëne.

Ik verkaup al waat jörkes electromotore beej de Firma Creusen in Remund

en doot mien werk nog altièd gaer.

Asse deure hobby's hebs en leuk wils woëne zulse auk waat veur de kos mótte doen

en ut hilt mich van de straot.

Beej mien iërste officiële interview wil ik netuurlik aope kaart speule

en óch verklappe det ik eigelik gaar **neet Carel** heit **maar Cees**.

Oké, ut begint allebei met un C en vuel minse kriège, dök in de pubertièd, unne beejnaam.

Maar miene roopnaam is jaore geleeje door un schoëlblaedje veranderd in Carel .

De oorsprông van die identiteitsverandering geit gans truuk naor de jaore 1965-66 .

In daen tièd zoot ik op de LTS en ik waar bevriend met o.a. Dick Evers .

Weej hadde op schoël un hitwaekrentje, un soort mezièkblaad.

Dao stond elke waek un verhaol in det begós met de vraag:

"Hallo Carel, heb je de hitweek al geleek (gelezen)"

Dae zin woort op un gegaeve moment auk unne hit beej de vrindegroep.

Dick bleef mich vanaaf det moment aanspraek met **Carel** en **Cees** is noëts mièr truuk gekômme..

Hebse nog mièr hobby's boète badmintonne.


Jao, ik heb un zwaak veur alles waat riet, d'r môt waal unne motor in zitte.

Ik bin veural bliëve hange in ut soort auto's wao ik mei bin opgegreujd in de jaore '70 en as ik die einmaol heb doot ik ze nimmer weg.

Ik heb o.a. unne Jaguar en unne Mercedes die allebei 35 jaor ald zien.

Dao riej ik geregeld in en kin ik óg waal ut ein en ander euver vertelle.

Maar messchien is ut verstendiger un foto te laote zeen en óg de details te bespare.



Op 17 jöörige laeftièd heb ik **miene ièrste motor** gekoch, veur de kinnere unne **HD 750CC Liberator**.

Ik vind ut prachtig um op miene motor op mien gemaak rônd te rieje in un moëje umgaeving.

Dan heb ik in un loods nog waat alde auto's staon, neet det die allemaol riejvaerdig zien maar det hoof auk neet drek.

Vaerder bewaar ik allerhande onderdeile die messchien nog te gebroëke zien veur de auto's die ik noow heb of nog krièg !!

Wie motorblök, asse, bekleiding, jao d'r is zoëvuel wasse kins beware en de mós altièd veuroét dinke.

Regien is dao neet zoë bliej mei want de kelders staon thoès good vol en dan is d'r gen plek mièr veur andere dinger

Ik môt toegaeve, het haet ut neet altièd gemakkelik met mich.

Ozze Frank is net zoë autogek as zien vader en weeje zien geregeld same in de kelder te vinde aan ein of andere klus.

Tösse mien 45e en 50e laevesjaor had ik de keus: Un vriendin of toch maar weer unne motor en.....ut woort ut letste.

Mazzel veur Regien netuurlikof veur mich, det zoel ik neet drek kinne zegge.

In 2005 heb ik met de motor un vervaelend ongelök gehad en meus unne tièd verstek laote gaon met badmintonne.

Tösse häökskes; miene gaele Koga- fiets, inmiddels haos 30 jaor ald, kump auk nog geregeld oèt de kelder.

Noow ik d'r zoë euver nao dingk bin ik eigelik bes zunig met mien grei.

Bergwandele vind ik auk un leuke bezigheid.

10 jaor langk bin ik met unne groep minse van ut ziekehoès 4-5 daag in de Vogeze gaon wandele, det beveel prima.

Ut bergwandele met Rapido is d'r vanaaf mien ongelök neet mièr van gekômme.

Ik kôm de letste jaore eigelik tièd te kort en det kump gedeiltelik door ut werk.

Werke is neet ut probleem maar de vreeje tièd dae ut kos waal.

Daobeeje zien heej in hoès nog lang neet alle klusse gedaon dus.....

In welke auto zoelse ut leefste wille rieje asse vuel pieke hads.

In unne **Alfa Romeo Montreal** kiek maar ens op de foto waat un beauty.

Ik bin erg Alfa-minded maar ut môt waal achterwielaandrièving hebbe,

ik veul in unne auto meteen wao de aandrièving zit.

De zoels "as leek" zegge waat mak det noow oèt;

as den auto d'r good oèt zuut, ut altièd duit en mich everal naortoe bringk mak de plek van de aandrièving toch neet oèt.

Ut klink messchien waat eigewiès maar det is ut geveul van de autokinner en kin ik neet oètlegge.

Messchien bin ik waal té fiengeveulig op det gebied en de wets waal iddere gek haet zien



gebrek.

Zoel ik daarom in Tegelen woëne messchien....?

Waat vinds dich de leukste of vervaeldste verandering met betrekking tot Rapido.

Wao môt ik beginne, d'r is zoëvuel veurbeej gekômme de aafgelaupe jaore.

Um met ut vervaelende te beginne, de veranderde aanvangstièd van de trainingsaovende.

De training begös ièrs um **nege oor** en det is jaore geleeje verzatte naor **ach oor**.

Nao ut werk had ik mien vas röseurke op de bank tösse 8 en 9 en det is mich zônder te vraoge aafgepak.

Ik heb d'r nóg aaf en toe las van op dônderdaagaovend.

Geisse gaer op vakantie en waat haet dien veurkeur.

Weej gaon zelde op vakantie, waal aaf en toe un wiekendje weg b.v. met Rapido.

Of we gaon met bevrinde stelle wie Fons en

Maud met de vrouwe waat ônderneme.

Ik heb al verteld det ut wandele d'r de letste

jaore beej in is geschaote, det vind ik ech

jaomer.

Want waat actie op un vakantie vind ik leuk

maar ut môt waal allemaol veur mich

geregeld zien.

Zélf iets oètzeuke en regele is neet mien

hobby en laot ik gaer aan andere euver.

Weej hebbe thoès eigelik alles beej de hand

en zien d'r tevreeje mei.

De kins zegge: un kinderhand is gauw gevöld

maar dan in ut Tegels netuurlik.



Ik zoel waal gaer ens de "**Mille Miglia**" wille rieje in unne **Bertone**.

In de beginjaore waar det un evenement met de baeter gesiesde en de groëte sportjônges.

Dao pasde Carel van Vugt neet tösse en ik had auk neet zoëvuel pieke.

Noow is det un rally van 1000 mijl veur old-timers door Italië van Brescia via Rome weer truuk naor Brescia.

Messchien kump ut d'r nog ens oeits van in unne moëje old-timer; unne mins môt nog waat te winse hebbe.

Op welke plek mósse volges dich eine kièr in dien laeve gewaes zien.

In Das Goldene Anker of in de Bananebar.

Met wae zoelse unne kièr un beschuutje wille aete en waarom.

Met Regien heb ik det dertig jaor geleeje gedaon, weej aete noow nog waal ens un beschuutje huer,

maar neet in bed want det kruûmelt zoë.

Noow zoel ik waal ens un beschuutje wille aete met **Vicky Butler-Henderson**.

We kinne ôs un bietje via internet en ik heb gemerk det we vuel dezelfde interesses hebbe.

Vicky is un actief en vlot maedje en dao hald ik waal van.

Noow zal den eine of den andere waal dinke: jao jao op unne alde fiets môt het ut lière ,

maar det zit toch anders inein.
In dit geval kin ik vuel van úm lière, op de foto kint geej um alvesses lière kinne.

Wao hebse unne groëte haekel aan.

Ik bin bliej det ik de kans kriëg op dees plek mien meining te gaeve.

Ik heb unne groëte haekel aan ut vruug opstaon veur de repetitie van de köskepel op zôndaagmorge as de zôn nog neet gans op is.

10.00 oor is toch unne ônchristelikke tiëd veur un repetitie op unne rösdaag.

We begóste iërs um **11.00 oor** en dan kinse op zôndaag tenminste röstig op gangk kômme.

D'r zien dink ik minse beej de köskepel die um 12.30 oor aan ut middaagaete môtte zitte maar in Tegele zien we waat soepeler waat det betref.

Vaerder hald ik mich neet zoè bezig met waat andere minse doen.

Regien mak mich d'r op attent det ik mich waal ens kwaod maak as ik de krant zit te laeze en det klop.

As journaliste ein artikel schriëve met taalfoute in en neet weite wao ze ut euver hebbe dan gaon ik hardop vlooke en dink:

"Lier dich iërs laeze en schriëve veurdesse geis werke".

Hebs dich un laevesmotto en waat is det.

Mien motto is: **Zörg good veur morges want vandaag is al bijna veurbeej.**

Waat goof dich tot noow toe de grutste kick.

Toen ik op miene motor unne moëje bóch makde waobeej ik zelfs unne **Ducati** binnedoor inhaalde.

Zoelse iets aan dichzelf wille verandere en zoë jao, waat dan.

Ik zoel wille det ik sneller un besloët kös neme.

Ik dink dök lang euver iets nao veur det ik de knaup doorhak en d'r veur 100% achter staon.

Regien zal dus 37 jaor geleeje waal ut besloët genaome hebbe um te trouwe.

Of waar ut un logisch gevolg van un vreejerie, "de bis jôngk en de wils ens waat miër! "

Toendertiëd waar ut nog neet d'n broëk um te gaon samewoëne anders had ik det waarschienlik iërs gedaon.

Maar ut is op deze meneer auk good gekômme.

Waat zoelse doen asse Börgemeister van Venlo waas.

Vertrekke naor Numwaege.



Wao hechs dich vuel waerd aan.

Ik hech vuel waerd aan langdeurige vrindschappe.

Vanaaf miene schoëltièd, en dan heb ik ut euver de LTS en MTS periode, hebbe weej un vas vrindegruupke.

Oorsprônkelik ware we met 8 man, maar noow treffe we ós nog elke waek met 5 vrinde.

We hebbe in die jaore zelfs al 3 kier un treffe gehad met diverse ald- lièrare en det waar kei gezellig.

Door huwelik, kinder, drökke werkzaamhede zooge we ós unne tièd waat ôngeregelder.

Um te veurkômme det we ós oèt ut aug zoele verleere zien we un mezièkkepel begônne ónder de naam **Mingelmoes**

Os dames hebbe nog un aantal jäärkes meigedaon, vandaor de naam **Mingelmoes** maar die zien d'r inmiddels allemaol mei oëtgescheid.

Unne gas jaor truuk is de mezièkkapel **Mingelmoes** opgegaon in de Nachravers en dao bin ik nog steeds lid van.

Wie zuut diene perfekte daag d'r oèt.

09.00 De wekker geit , ik staon metein op en stap ônder unne stevige douche.

De wets waal zônne douche met unne hiele groëte douchekop en links en rechts halverwaege auk nog waat straole.

09.30 Un lekker ôntbijtje, uiteraard same met Vicky, in de schaduw van unne dieke baum.

10.30 Met Vicky un ritje make door de neteur, dao wil ik vaerder neet euver oétwieje.

12.30 Tièd veur unne lichte lunch op ut terras van un leuk italiaans restaurant wao aan de achterkant unne moëje tuin leet met vuel graas.

Ik zoel mich langk oèt op det graas smikke en un halfoor de auge dich doon (in Italië hit det hiël moëj:siësta.)

14.00 We bestelle ós un diek iès en miechele det lanksaam op en as aafsloèter pakke we un lekkere tas italiaanse cappuccino

14.30 Same make we un korte wandeling, waodoor ik toch ut geveul heb det we iets gezônds gedaon hebbe.

15.15 Noow efkes un paar eurkes good gaas gaeve met Vicky naeve mich netuurlik

18.00 Nao zôn lange rit is ut tièd veur un relax-eurke want we gaon pas um 20.00 oor aete.

20.00 Lekker oëtgerös zitte we aan unne italiaanse maoltièd met un paar romantische kerskes en lekkere wien op taofel.

Nao waat schaele wazel onderein verkoch te hebbe gaon we op tièd naor bed.

D'n daag d'rop um 09.00 oor waer ik wakker en kôm tot de conclusie det ut ech gebeurd is, ik heb hielemaol neet gedruimp.....



Det is pas unne aafsloèter of neet.

Elly van Elswijk